

Minister Fredis Refunjol a celebra cu prensa 30 aña di servicio publico y 20 aña den politica

ORANJESTAD – Ayera e miembronan di prensa cu tur diaranson ta cubri e conferencia di prensa di gobierno na bestuurskantor, a wordo sorprendi cu un situacion unusual, principalmente den e situacion actual di austeridad riba maneho di finansa publico.

Ayera e periodistanan a disfruta di un dushi croquet y pastechi bon traha cu a ser cubri cu e presupuesto personal di minister di Enseñansa, Fredis Refunjol cu a desea di comparti cu prensa e hecho cu dia 1 di augustus ultimo a celebra

su prome 30 aña di servicio publico y na april ultimo el a haci 20 aña den arena politico. “Boso nan por calcula awor cuanto aña mi tin”, asina e mandatario a bisa.

Dia 1 di augustus 1973, e actual minister di Enseñansa a cuminsa traha na Heilig Hart Collège, el a para 8 aña dilanti klas, y djei e tabata cabesante di e mesun scol menciona. “Ainda mi curason ta ayanan, pasobra e ta un luga unda cu mi a traha masha dushi mes, den mi bario of nos bario”, asina e mandatario a declara.

Despues pa casualidad despues di un combersacion cu e tabatin cu sr. Betico Croes (q.e.p.d), el a dreña na arena politico Arubano, y esei a tuma luga 20 aña pasa tambe.

Fuera di esei e mandatario tabatin diferente tarea den gobierno: El a traha 9 aña como miembro di parlamento, y 8 aña como minister. Pues 13 aña na scol, 9 na parlamento, y 8 como minister asina nos por conta e 30 añanan di servicio y bida publico di minister di Enseñansa, Fredis Refunjol. Ayera el a ricibi pabien for di su coleganan minister di Labor, Cultura y Deporte Ramon Lee; Minister Plenipotenciario, sra. Ella Tromp-Yarzagaray, y minister President, Nelson Oduber, hunto cu tur miembronan di prensa presente den e conferencia di gobierno.



Minister di Enseñansa, Fredis Refunjol